

千

山

詩

集

千山詩集卷十一

博羅剎人可禪師著

書記今羞編

七言律三

余與大來甦築俱生殘冬感而賦此

肯從斯世問窮通
千載應知吾道東
延齡共向蠹魚窟
立命全歸磨蝎宮
不堪死地論生日
何意令人見古風
異姓麓墳原匪偶
胚胎冰雪本來同

大雪宿白塔寺靜公禪室

浮屠殘鐸舊朝遺
扶杖何須夙有期
雪裏敲門僧定後

千山詩集

卷十一 七言律

松間振錫鶴歸時一鑪芋火三更話七箇蒲團百丈規
壁上燈微鐘鼓寂寒襟如水自應知

再宿靜公禪室

城邊猶見未燒庵重扣柴扃夢正酣畏客不除當路雪
采薇常帶遠山嵐漫拈黃葉爲清供再剔殘燈續夜談
半榻颼颼寒共被枕頭惟有舊經函

三宿靜公禪室

春前一夕

一度相逢一度新踏水捫雪不嫌頻暮烹野菌忘僧律
遠插疎籬隔世塵白麈揮殘寒塞月黃鷄叫徹法堂春
從今半席長虛待到此應知無別人

得寒還札

因聞蕪夷歸里

敢向寒邊歎索居衰殘難執化人裾曾同一窖終憐雪
已到中天却寄書生死既分情倍切去留雖異罪仍俱
竹林未便成荒棘珍重逢人莫謾歔

同諸老夜話

枯藤到處撥荒萊誰遣刑餘老殍來却怪少林空面壁
漫傳北海亦浮杯談深瓊帳三聲角坐老寒鑪一寸灰
窓外雪花飛片片莫將消息問邨梅

辛卯歲除

遼東何以送殘年自汲寒泉奠昔賢子慶掛冠甘永遜

幼安坐榻久將穿幸餘坑燼分僧鉢不少山癯問法筵
誰道西來真有意漫拈白拂豎空烟

除夕懷諸子

亦是尋常朝復夕何當茲夕倍愁予莫將爆竹驚窮鬼
只合燒桐煮白魚朔雪自能填客夢春風無望到吾廬
可憐年盡寒難盡土榻斜眠枕破書

壬辰元旦

起起今年恰在辰罪夫幸不是賢人堂前鐘鼓龍天會
被底冰霜骨肉親兩點尚餘隔歲淚五更曾夢度江春
龍庭色色還依舊獨有閒愁一片新

元旦大雪同甦築賦

昨暮行過已隔年相將長揖謝高天似憐窮佛添花雨
肯爲寒儒鋪白氈權作江梅當折贈漫敲石火任烹煎
饑腸宛轉澆應遍又是賡酬第一篇

南塔結制

堅冰漸解柳初黃鈍斧誰將劈巨荒但任疎狂留本色
不妨粗糲是家常千羣龍象歸華表萬里風沙建寶坊
幾向棒頭明正眼混同依舊浩茫茫

聞大來爲假僕所劫

殘編猶可度朝昏四顧應知天意存窖底未容留點雪

枕邊依舊剩空罇寒當徹骨詩方富窮到盡頭道愈尊
獨有老僧愁更劇從今托鉢向何門

聞同難民爲虎所食

何須今日方憐若一度邊關卽鬼門身死不煩蠅作弔
年凶惟見虎加飧只愁老瘦重遭斥但免饑寒亦感恩
白雪一杯魂未遠料應笑我骨猶存

聞耳叔弟盡節

大旗吹折海風寒未了孤心骨已殘遺訓在茲寧有憾
浮漚于汝久無干原鴿血盡生逾苦池草根鋤夢亦乾
見說覆巢餘卵在呱呱何處夜漫漫

答順天師

夢裏冠裳付劫灰，衲衣趺坐冷雲堆。
懸崖有鳥銜花下，隔水何人問字來。
斷碣遠搜箕子墓，破鞋羞踢李陵臺。
相尋不爲鄉情重，白拂交橫笑口開。

白蠟梅花

侍者以白蠟爲梅花作供，色韻酷肖晨夕對之不啻身在故鄉賦此誌感

十年負却舊山期，絕塞誰拈此一枝。
有骨莫愁冰雪沁，無香休惹蝶蜂疑。
魂飄萬里村俱幻，夢到三更月共知。
最好不關開落事，樓頭玉笛漫孤吹。

千山偶成

枕石欹眠覆短松，到來時有鹿麋蹤。
邊愁浣盡山山雪，

千山詩集 卷十一
四
鄉夢敲殘夜夜鐘一鉢野蔬消不了半龕寒月幸能容
故人相憶如相問只恐携雲過別峯

李公初度集洪福庵爲陳氏披薙時重陽後一日
昨日登臨笑語親今來又恰趁芳辰採將菊蕊猶堪獻
贖得蛾眉始是貧滿院鍾催新佛子一天霜罩舊詞臣
老僧不及籠中鶴仍帶寒雲繫海濱

步韻和李公自壽詩

偶然一現宰官身勳業從今問野人半局乾坤能共老
一罇賢聖欲偕春木天殘夢風吹盡白板深秋杖過頻
謔語狂歌俱可紀世間除此卽非真

大翁招同觴李公

行過竹杖自忘疲，霜滿袈裟酒滿卮。
籬下又多一日樂，鱸邊何必十年期。
談深不及人間世，禪喜時添袖裏詩。
二老孤僧成底事，夜寒燈火漫敲棋。

李公贖陳氏爲尼三首

學士行歌績，婦迎驚回春夢起。
鄉情解將腰帶文，犀重添得空門水。
月清雲鬢已隨秋，霧散舞衣應逐雨花輕。
翻憐塚畔青青草，不及紅蓮積上生。

淨洗鉛華迥不羣，袈裟新換石榴裙。
幾回賣鏡凌寒雪，何意開籠見白雲。
撥盡琵琶鳴曉磬，翻殘貝葉惜迴文。

十年抱志今方遂多少鬚眉得似君

不是流人淚亦橫夕陽荒草訴中情自拋家國甘心死
竊比冰霜徹底清玉塵柄邊紅粉淨孤鸞鏡裏白毫生
從今喚醒梨花夢收拾殘魂禮佛名

過李公寓同錫侯夜話

半間茅屋古皇前石火燒泉話舊緣冷月高懸居士榻
暗風斜吹孝廉船挑殘燈碗鐘來寺敲罷棋枰雪滿天
共臥片氊拳作枕布衾如鐵夜如年

雪夜懷李公

鐘盡燈微擁破衾長宵獨雪伴枯吟泥牀白滿予方臥

疎壁寒飄爾莫禁都尉已明三老意鄴侯未了十年心
何時日出消殘窖酒作人間遍地霖

和謙受始見塞雪詩

寒天難曙角聲催被薄風停雪又來窖臥六年僧已老
窓飛數點客方猜乍如浪濺錢塘月安得香飄庾嶺梅
賦罷不妨乘興過撥開糞火倒殘盃

聞錢君至尚陽堡死

相逢不禁淚淋漓忽訝音來我自傷一片心肝還日月
五更風雪裏文章黃沙隨夢歸香閣白水招魂入寶坊
莫爲中原難側足故將殘骨擲龍荒

播船堅辭大法招相隨乞戒喜示

不向天龍會裏尋空堂丈草漫沉吟田衣獨耐長邊冷
鐵篴橫吹太古音金色何妨三度舞神光又見一腰深
了知處處笙歌滿休悔從前錯用心

義臣作麼二子歸海州有懷

橐筆經年意未窮
芒鞋緊峭任西東
星文已見龍津合
電影終憐冀北空
瓶貯天山山畔雪
錫飛遼海海門風
何時擁毳團圞話
坐數寒更楫柁紅

病歸承李公以詩見訊用韻奉答

一從出塞骨先殘
扶病歸來怯路難
寒雪有心依破衲

枯腸無力進朝飧，呻吟亦可參清梵。詩句真同續命丹，自是故人情獨切。此間誰復問袁安。

步韻和麗大師寄懷詩

艱難百折兩人同，舊話峯頭願不空。佛似一家傳世業，天教五國大門風。此心肯共滄波去，片紙長留朔雪中。萬里遙遙情脈脈，嶺雲邊月望何窮。

弼臣病阻白門，兩次寄書并詩，因成二章，兼次其

韻

驚傳一紙到遼陽，舊國樓臺種白楊。我友盡人惟汝在，而師更苦復余傷。孤舟臥老長干月，破衲披殘大漠霜。

共是異鄉生死隔西風吹淚不成行

兩度書來僧正眠石頭仍繫孝廉船交情尚擬還鄉曲
病骨先殘出塞前舊閣遺經難可問覆巢餘卵復誰憐
幸留花雨沾新塚始信雷峯別有天

高含章出塞訪友

拂袖離家出玉門故人何處骨應存長邊自爾無艱險
異姓于今有弟昆覓窖已捫千嶺雪招辭兼得一僧魂
殘醴欲盡難分供春老荷鋤掘草根

遊香巖寺

時諸老重建謀迎
空老人同麗大師

千峯頂上香巖寺積雪何年古道堙航海尚傳元學士

登臺空揖石仙人寶幢雨洗燈方續禪榻雲封草漸新
佇望雙飛天外錫寒邊早布十分春

送明藏主同大莖屍林二子南行

南詢萬里雪風乾拄杖如龍路不難欲向曹溪掬香水
好從長慶禮蒲團刺桐花底分麋影荔子枝頭乞鳥殘
想得別峯相見處定應先問塞兒寒

因事似我存

金石繇來未易論多情翻怪別疎親傷心此日棄如土
絕漠相看賸幾人幸以艱難存道味何妨怒罵爛天真
宵懷但使同空水始信天涯必有鄰

贈陳令公二首

鳧飛出塞及春晴
望見前驅老鶴驚
學道定知君子愛
受塵俱願聖人氓
錦囊尚帶花香氣
竹馬還添水月情
草昧經綸文事重
行看大窖起歌聲

本是雙林大士家
來尋丁令問桑麻
琴聲冷遞沙邊月
雪辨閒飄縣裏花
虎豹擎兒初度水
人民連雨盡隨車
大荒到處應犁遍
一鉢從今莫浪嗟

同甦築謙受夜坐

似我安能不極邊
何堪二子亦如然
路遙自愛親鄰盡
世難同傷祖父賢
只恐冥冥僵雪底
故應數數話燈前

乾坤刀斧子無恨生死文章各勉旃

寒食偕諸子訪苗李二鍊師歸見木齋留詩同賦
杖頭安得紙爲錢漠漠風吹寒食天野哭又添沙上鬼
暮歸因問洞中天騎驢人去空留句坐客牀餘未啣氈
三輔遙傳榆柳盡何須待禁久無烟

風雨懷我存

肯教一日不相聞風雨蕭蕭咫尺分鄉夢久殘思轉劇
硯田漸熟恨方殷拋書乍可尋黃鵠陟岵無勞望白雲
桃李成蹊春已老爲君何事淚紛紜

送高含章

故人一見卽回程萬里風沙兩屐輕袖裏新詩惟獨咏
匣中長劍莫教鳴翻憐野鶴無高舉誰信冥鴻有至情
歸去不須重記憶天山積雪夢猶驚

喜貴庵托鉢回

鎮日相尋屐齒頻經年始見意逾新一瓢尚帶書生氣
兩袖新携上國春看盡空花會可摘探窮寶藏總成塵
故鄉田地從來穩不到無錐未是貧

浴佛日壽陳令君二首

蕭蕭匹馬度龍荒翹首真同白象王冰雪尚酬文佛債
栴檀新浴令公香盡銷兵氣爲農具好借僧瓢進鶴觴

却笑河陽空滿縣，曇花一朶現遼陽。

現身仍是舊王宮，荒草頽垣不厭窮。戶口疑從兜率下，
威儀尚與漢官同。量晴較雨推新政，翻貝尊僧本素風。
雲水滿堂春滿野，樂郊今在大關東。

唁

燈前雪底亦空言，寒淚無端濕五原。大道翻嫌諸聖淺，
奇情難與老僧論。平生最苦肝腸熱，今日方知裘馬尊。
不是唁君惟自唁，悠悠終恐骨孤存。

卽事似大翁木齋謙公諸同志二首

心比蒼松化石堅，迷盧却被一絲牽。蠅頭盡是英雄塚，

牛後須防牧豎鞭只此鬚眉何可賣任他溝壑儘堪傳
幾人絕塞身還在忍使殘僧淚獨濺

今古繇來夢幻中書生端合置鵝籠已聞越女與勾踐
難把銅山鑄鄧通虫死斷編終不惡門餘積雪豈真窮
人間何貴有朋友到此憐子道未工

同謙公談

我亦流民爾似僧半牀明月半牀冰既同患難聊相共
常恐肝腸未可憑天外幸能留破衲世間豈盡喪良朋
談深舌冷書爲枕宵負中宵一椀燈

偶成

寒燈一點暫相親，除夢都應不是真。
開口後來皆作聖，蓋棺前此莫論人。
鬼神未到須防獨，涓滴雖微便溺身。
縱死定令天亦見，肯教風雨暗青燐。

冒雨訪木齋不遇

草團風送雁歸聲，孤負春深雨未晴。
戴笠獨行韓大伯，到門不見李先生。
若非策蹇尋花笑，定是携詩倩鶴評。
爲語小童多汲水，明朝清曉待余烹。

贈赤公五首

幾年遼海自依依，華表驚添一鶴飛。
瓶鉢已非形更瘦，鬚眉猶在事多違。
長邊無地容行脚，盡日微天幸掩扉。

韎韐未裁磨衲破夢中還著老萊衣

願遍三千塵任揮到來況是舊王畿亦知冰雪皆恩澤
誰道雲烟省是非闕下已聞鐘鼓遍海東猶待雨花飛
天龍翹首余多病從此焚香老翠微

滿磧寒風柰若何逢人強自笑還歌杖挑百斛燕支雪
瓶注千尋鳴綠波高座不妨羣部擁窮途真恨一身多
近來分衛逢時稔敝緒泥牀亦好過

獅子曾聞住屬賓如空何必問前因霜連白草開荒後
日射黃金布地新舊疏未焚藏衲角長歌應悔雜京塵
當時妙喜交遊廣書到衡陽有幾人

而師亦是嶺南人共棹曹溪意自親
罪過彌天子作俑
饑寒到死汝爲鄰
生成枯骨非關病
剩有空瓢不道貧
何日玉門通一線
願隨高步抖邊塵

喜文立參方因請藏回

江北江南是舊遊
淨穉如虎靜如秋
去携隻杖同黃鵠
歸擁三車盡白牛
五位諸方俱已厭
千家一鉢更何憂
從今收拾西來意
屋裏青山好白頭

寄大翁

幾年何日不相見
相見應知各有詩
公到苦吟予獨賞
余當狂叫汝深悲
尋常只道窮邊事
隔別應生靜夜思

始覺寒冰良匪偶千秋萬古有人知

寄昭公

莫怪崎嶇出塞行猶將貝葉伴餘生
茹堂獨喜留山野楓陛能無憶老成
浮世謾論千古重蒼生甚切一身輕
關門不日牽雛去會見聯翩彩袖迎

寄乾公

挈杖尋君君未歸君歸余又掩山扉
日斜未許長看劍露冷何須短後衣
嘆息三良身莫贖經營半畝事仍非
低頭且就衡門下靜臥西風待曉暉

寄龍公

未曾相識卽相思咫尺寒雲阻晤期
青瑣夢回霜正滿
蒼生感極泪俱垂
敢言又見同人至此念終當聖主知
見說長安書一紙
浮沉莫使恐山麋

寄雪公

驚騎羸馬度荒巒
風冽衣殘獬豸寒
面帶天山懸洞雪
氣分巫峽瀉秋湍
四愁賦就教兒讀
五葉叅來把劍看
直待丹青高閣後
好携孤衲笑飛鸞

寄甦公

春風一別年將盡
相憶空傳半截詩
想爾獨吟逢客到
及余來訪又他之
門前老僕擔新雪
竈上寒灰覆舊磁

見說我行君便返人生離恨是今茲

寄我公

布帽疎櫛雪積鬚硯田半熟謾長吁看君此意存三代
念我當年共一孟壁倒不妨麋鹿入道窮終怯馬牛呼
殘冬暫耐寒將盡自有春風動破襦

寄孝公

君到荒山雲已出我尋破壁硯仍餘三更共臥吹殘骨
幾日重離恨索居采藥已驚林有豹彈琴何患食無魚
爲君仔細謀生事畢竟無過讀父書

寄謙公

歲歲年年愁雪下
年年歲歲望雲飛
風吹寸草心俱碎
手把殘編腹又饑
朋好幾人予最老
鄉關萬里日還暉
夢中頻見應頻問
果是人歸是夢歸

贈馮公

靜如秋月氣如潮
未老驚看鬢漸凋
挾策長歌來遠磧
辭家短劔自前朝
巫閭烟雨題千尺
滄海風沙見一毛
但使舊鄉看畫錦
急將雙袖伴僧飄

贈寇公

當時勸我還山好
此日逢君出塞行
兩世論交餘衲子
十年憶別尚書生
彩衣暫換悲荒戍
諫草還留感聖明

寄語雁行休悵望金鷄早晚下龍城

晤寇公寄呈其尊人

十年前話大江濤手把綈袍泪漬襟自別以來知罪重
相思無奈感恩深藏身蒼翠人三代繞膝爛斑玉一林
百尺長枝移遠磧夢中應見伴僧吟

和木公來韻

閒來但借鄴侯書短髮蕭蕭亦自如已識浮生皆客寓
得逢歡笑卽吾廬乞殮粗飯心無事補句殘詩習未除
偶欲尋山成隔別爾音頻寄莫教疎

德公約分半榻兼許春來代營茆屋

見我孤貧此念深把茆無計冷風侵夜長許共維摩榻
福薄難消長者金枵腹尚能留瓦鉢殘軀只合撇空林
未曾得罪從飄泊況續餘生直到今

秋盡錫公江南回相見

去時正逐飛鴻去來日還逢是去鴻斯世幾能憐范叔
有人猶自問洪公江濤秋色携雙袖貝葉新詩共一筒
客夢最憐翻在磧牛衣依舊耐寒風

諸公送余出郊心公詩先成賦和

平生不作有情別此日河橋泪欲垂共是異鄉愁獨往
非關繞樹歎無枝因君馬上臨岐句添我山中靜夜思

衰病況兼寒雪重春來杖屨未須期

聞與公與謙公同榻

文章豈莫柰貧何佛火淒涼影薜蘿
下榻幾人曾不顧閉門惟雪喜同過
凍毫呵後爭先草濁酒乾來共和歌
深夜漫言鄉國夢殘氈較淚竟誰多

哭晉中張子

羣雁聲摧影獨依文章嚼盡腹終饑
北堂自繞黃沙夢東閣仍開白板扉
劔缺不彈聲欲絕髮膚既盡骨思歸
遊魂無禁知先到寒極還應索舞衣

真乘予同門弟也前臘辭師欲出塞相訪以父在

遲遲其父呵之曰而兄不知死所道誼之謂何
遂含淚出門不數月其父已逝訃音至塞而杖
屨杳然引領西風感而有懷

幾年峯頂憶遼陽三拜辭師哭雁行我骨尚能支大窖
而翁早已擲浮囊死生總爲交情重星月寧愁道路長
錫影不飛冬又暮西風翹首思茫茫

哭圓寶

卽真乘父也

扶子携孫入化城闔天風雨草鞋輕此生已了人間事
到死還添塞外情萬里冰寒含淚遣一池花發撇衣行
瓣香欲寄黃沙隔孤雁無聲月自橫

遙哭錄用道廣兩僕

有小引

錄用執役先子幾三十年道廣亦不下十餘年
生性淳樸以故郭內外遺產皆其管理丁亥而
後諸弟相繼盡節當事執二人追其產二人私
相語曰二三孤幼在將何所存活因誓死不言
同斃於獄嗚呼誰謂死真易耶

此日誰能話感恩相將含淚共酸辛但留尺寸還孤子
不向詩書學古人獄底沉埋雙劍氣天涯悽斷一僧身
最憐大義歸僮僕亂世交親未敢論

千山詩集卷十二

博羅剩人可禪師著

書記今羞編

七言律四

寄答金道人 有引

予未薙髮時金道人隱予止園相得甚歡及余
結茅華首道人又來相訪盤桓月餘從此世事
波騰雲蹤縹緲十五年矣去冬道人書來并寄
所篆小印乃知道人左右空老人且喜且歎因
而有賦

故園花底憶同吟，結草峯頭著屐尋。
獨鶴一飛雲路杳，雙魚重問海波深。
山川已爛餘殘石，城郭俱非只寸心。
翹首黃龍酬唱處，真人天際淚橫襟。

寄答定者法姪

再拜榕溪不可知，我行顛險汝流離。
弓刀遍處還三匝，鄉國殘來剩一絲。
閩海驚濤親問話，遼天深雪望題詩。
邇年神鼎衰逾甚，只願汾州有此兒。

木公新齋成題寄

布帽荷鋤自闢萊，把茆小築近城隈。
木天分取遮遺卵，藜火還將爇死灰。
大雪齊腰仍蠹簡，西風開口共殘杯。

碁枰詩草留餘隙好待孤雲出岫來

寄題楚女屍

有引

江上漁人舉網得屍顏面如生衣皆密縫臂繫
白綾上題絕句十餘首不言姓氏蓋楚女被獲
恐爲強暴所污而赴之江者李太翁傳其詩于
塞上予哀而賦之

雪底挑燈續楚詞靈均何必是男兒恨留青塚黃沙污
拚擲紅粧白水知半夜驚濤酬絕句一江新月鑿雙眉
不傳姓氏人間惡母也如天自諒之

題鐵嶺燕巢

雪公鐵嶺寓舍有燕巢從者嫌其沾污欲毀之
公止焉燕呢喃若感遂移巢舍旁公爲文以紀
其事予感而有賦

巷口荒蕪舊路迷移巢將覈傍山谿未能仙嶠同高翮
敢向窮簷恨落泥似惜衣冠驚避遠難忘恩誼故飛低
門前便是鷹鷂集縱有雕梁未可棲

寄江士輝

詳紀事

驚看片紙到寒邊納納乾坤一少年獨向覆巢收落羽
又從餘燼授殘編微言豈爲懷孤鉢大義真堪起九淵
和泪焚香開口笑世間世出只如綫

讀趙公受偶爾吟

一編偶爾寄窮荒，纔讀詩題淚已汪。
古道多年埋蔓草，人間此日見文章。
三山一諾千金盡，雙袖長歌五嶺香。
再拜雪天重閱竟，杖頭瞬息到家鄉。

題江趙紀事後

千金字字淚行行，三讀誰能不斷腸。
詞客有心悲故舊，門人空手哭冠裳。
諸孤已見程嬰誼，萬里全傾陸賈裝。
刻石鏤肝非報德，人間萬古亦荒荒。

題文空新室

卽吾寓處也

門裏青山門外谿，杖頭剛與白雲齊。
不因老衲能偏好

那得長年此共栖抱病高眠隨日暮閒吟獨步過峯西
人生只此真堪老況有松花共鳥啼

重寓文空新室

豈有窮猿偏擇木到來此地便相宜雲生榻底長聽鳥
雪滿峯頭自賦詩難得主人終不厭幾多弟子盡如斯
從今拗折烏藤杖久病無能力已衰

證西堂新創落成二首

插將莖草地逾幽況有長松溪水流四面儘容千指繞
一勞便可百年休梧桐已種寧憂鳳江海無機自任鷗
何日雨花峯頂上願隨龍象一擡頭

敢負心期力已非年來多病願俱違
門庭既立仍虛待雲水行看此地歸
橫出一枝猶寂寂曾經三棒自依依
客牀半尺須頻掃拄杖時來問翠微

送寧古壇諸公

已到邊庭苦不禁崎嶇重復度荒岑
不因客夢今逾遠誰識君恩此獨深
匝地總應承露遍長途終自怯風侵
天心無外春將到自有金鷄出上林

贈魏李兩公子

翩翩魯國兩書生春日同生塞外情
白馬併駝黃卷重黑貂新換彩衣輕
暫將菽水心無恨縱是晨昏涕愈橫

子舍未容難久戀回頭漠漠暮雲平

寄阿象姪

細想形容十載餘口呼伯伯手持書未知何日重看汝
已恐相逢不識子大難屢丁年正弱竒恩畧述淚盈裾
好將兩弟無窮話到此難云只有歔

寄陳公路若

有引

丙寅秋予侍先于南都署中木樨盛開月峯伯
率一時詞人賦詩其下予雖學語未成竊喜得
一一遍誦及薤髮來南與茂之相見已不勝今
昔之歎今投荒又八年矣赤公至述長安護法

首舉陳公爲吾鄉人卽木樨花下賦詩人也鄉
國荒蕪親朋凋謝還思太平樂事益增感愴偶
因便鴻詩以代札

三十年前一小兒木樨花下共題詩于今老大投寒磧
獨向冰霜憶舊時嶺徼親知無復在石頭賓客更誰遺
聞人說道陳公好洒淚空槭一問之

大翁携來琴書硯帖俱典盡感賦

年來欲典已無衣諸友相隨願盡違霹靂祗從夢裏聽
雲烟不向冷邊飛田荒池涸端溪遠鳥死虫枯棗木稀
獨有老身無賣處好携破卷共僧扉

卽事似冠公

君多意氣跨虹霓爲憶趨庭話昔時滿縣桃花誰再種
前朝水鑑又同持投荒後至推前輩傾蓋新歡勝舊知
抖擻空囊分片雪遠公無酒恨攢眉

重陽前一日子至潘木公雪公約遊千山不果

雪裏剛回杖未休又逢二老約同遊爲貪一日重陽酒
深負千峯萬壑秋逐客尚添猿鶴怨殘軀寧抱虎狼憂
莫因無妓拋雙屐松下還教片石留

同赤公遊千山途中遇雨

未曾說法雨花新一路雲龍結勝因天意欲施七嶺澤

山靈先洗八街塵骨寒竹瘦衣增濕石滑溪深步更遲
可惜巖巒無限景會當日出見高旻

接本師書并衣杖諸物

開緘百拜淚淋漓萬里叮嚀塞上兒飲水幾人頑最苦
燒香七處遠應知寄衣只爲水霜冷還杖須憐步履疲
話到曹溪終不可年來多病命懸絲

寄荅智師弟

閩天萬里見題詩喜極翻令暗自悲力大有人飛嶽頂
罪深如我擲邊陲座前花雨多飄散亂後巾瓶仗護持
世事未知師已老報君三字莫輕離

寄法緯因雷而思諸兄弟

萬壑千峯共掩扉華臺一下願多違
舊時尚有幾人在遠塞先分隻雁飛
師齒已衰兼久病世途多難更誰依
亦知不待殷勤囑大雪題詩淚濕衣

明藏主奉老人小影歸同諸子瞻禮

面目分明錫不飛十年想見見還非
攢眉只爲羣生苦瞪目仍期一子歸
冰雪未沾頭已滿巾瓶雖遠影長依
諸公莫道無言好泥首同瞻白日輝

明藏主闕回

春曉辭家秋暮歸杖頭偏與雁相違
去携塞雪江聲冷

歸散闕天月色輝荔子乍嘗思嫩蕨麻鞋已破抖塵衣
逢人莫話西來事萬里長風淚易揮

哭大莖

同明吾藏主屍林入闕
還至石頭卒于天界

三人結伴兩人歸一見西禪撒手飛莫爲龍庭嫌雪重
却從天界戀花叢夕潮竟渡鄉情淡曉夢仍懸舊願違
一榻幾年今已矣他生何處更相依

恥若作麼定元刻新錄回

聯袂歸來曉露寒更揪剩語淚重彈三春血濺燕支冷
一吼聲摧黑水乾鷺嶺已嫌成逗漏曹溪又見起波瀾
年來三復金人戒罪我無辭只任看

與屍林

長携一笠逐枯藤浮月匡雲許共登既向石頭悲斷梗
又從海岸覓殘燈幾人患難知余病萬里弓刀羨汝能
最惜寶山親到後仍將空手伴寒冰

贈祥光

不向枯株學坐禪生涯只在鑿頭邊豆花香處雲偏濕
瓜葉蠻時月更鮮义路泥深休縱步短窓風靜好安眠
何須更話西來事雀上高枝噪暮天

哭邢孟貞

未曾言病只言貧書到秋殘泪已頻大窖尚留懷我句

中原又喪老詩人，顏分主簿吟邊瘦。
道在襄陽，阨處真有子最憐。
遺卷在，鬼神長護石湖濱。

乙未生日四首

清曉拈將一瓣香，低頭欲祝意茫茫。
闔天片笠風濤惡，嶺海豐碑草木荒。
出世既違千劫願，生人空斷九迴腸。
却慚歲歲當茲日，猶把餘骸抵冷霜。

黃雲稠疊日沉沉，剩水殘山一點心。
編簡零灰留種在，門牆片瓦感恩深。
梅花夜夜飄荒戍，雁羽年年向舊岑。
每到余生寒不盡，幾回搔首一孤吟。

孤身自昔沉于今，塵夢醒來更不禁。
骨化僅餘歌嘯習。

劫灰難了友朋心百年金石歸浮沫四海龍蛇尚好音
幾個難飛寒雁影夜深長與繞空林

是我何妨白晝過匝天花雨亦蹉跎江河易返春無脚
烏鵲難飛雉有羅努力烟雲兼短褐關心天地況長戈
亦知自古林林恨一一酬他泪點多

奇順天法主

多年石壁坐空寥問法歸來與獨饒砂磧聲傳金殿鼓
海門波湧浙江潮雨花忽向冰天下鹿豕何煩玉塵招
懶慢無心非退席深山大雪亦齊腰

哭左吏部大來八首

尋詩問道幾稠繆八載交情一夕休
拚取鬚眉埋大壑肯將肝膈付東流
生前不異黃泉路死去安同白玉樓
欲擬大招何處好歸來依舊是窮愁

曾期哭我必公詩豈料公先我自悲
共酒十年前代淚獨留數卷後人思
于今白社無陶令難把黃金鑄子期
縱使故交捫雪至不知將劍掛何枝

如此漂流死不辭黑雲如幕雨如絲
世間無處堪容膝地下何人共賦詩
已并二難欣定論未完一著哭殘基
他生尚有投鍼約獨獻龍江水半卮

三更月黑漏遲遲正是同君永別時
殘藥已拋餘宿火

孤燈還照舊題詩
鴈羣入霧行
應斷鶴子無陰和更悲
我欲吞聲吞不得
杜鵑啼徹海東涯

歸心客恨漸能刪
寒夢依然未許閒
病久已知身是幻
朋來方識道維艱
欲空世界看兒女
得外形骸任往還
此去黃墟無禁令
飄魂應已度勞山

三月寒邊不見春
西風落日暗飛塵
青山自愛文章鬼
白馬都來放逐臣
新句定將尋杜甫
續騷只可問靈均
不愁寂寞無知己
况有當年舉案人

勸君自昔猶嫌晚
道氣如君本自餘
白日幸同皈繡佛
黃沙何必泣紅魚
不留積恨知浮沫
那得遺金只破書

最好良朋相對死

公臨死自言

肯將點淚滴殘裙

吹墳直向首陽巔一擲愁城亦卓然
半世交遊臨死見千秋詩句仗僧傳
尚平有託何須恨屬國無歸不自憐
獨惜唱酬冰雪慣知君還賦和予篇

送登徹僧主香巖受具

千里崎嶇問翠微香巖重啟舊雲扉
鉢浮王氣看龍起錫度寒烟伴鶴歸
戒月高懸山寨冷雨花長傍寢園飛
從今天外尊惟獨白拂高懸任指揮

雨中同諸老衲爲左公持誦經咒

茆堂漠漠雨沉沉破卷寒雲一世心
歿後還來沙際鶴

言集 卷十二
幾餘空掛壁間琴久知此日無堪戀又喪斯人更不禁
梵唄魚聲渾是淚悲涼豈獨自于今

爲左氏諸孤托鉢

見說遺經那可憑敝羸殘帙恨層層修文獨取多愁客
乞食還餘未死僧衆口共餐朋友淚遊魂孤照法王燈
明知一粒須彌重坐視饑號自不能

瀋城卽事

生殺繇來總是恩流離十載衲孤存雁飛成字頻遭射
金鑄爲人自不言遷史有文觀未達歲公無命道彌尊
殷勤拜囑勞勞客好向空花仔細論

南塔卽事

舊好新知總莫論，彌天風雨自孤鶩。
大呼欲折將軍樹，隻手能招楚客魂。
豈是艱難存古道，獨將毫髮透空門。
何當振袂春風起，一拂寒沙徹底暄。

買老馬二首

歷盡崎嶇意不驕，岐嶇瘦骨自前朝。
悲嘶曉月連孤磬，徐踏山花過短橋。
齒長更無煩玉勒，囊空猶未撇詩瓢。
誰言志在仍千里，伏櫪還堪伴寂寥。

驪山沙苑總荆榛，暮景翻憐塞草新。
夢怯吹笳明月夜，別思啼鳥綠楊津。
身羸似學支公病，價賤還因伯樂貧。

幾載冰霜愁力盡何時重踏嶺頭春

同天中清臣赤岳過山寺看花

竹杖行過暗愴神同來況盡異鄉人日光獨照黃金地
天意還留紫塞春嶺徼十年花是夢江南六代錦成塵
可憐對此渾多淚不道空門淚亦頻

天中同清臣赤岳入山相訪

筆如嶽立氣如潮遠戍間關興更饒旣挾金蘭同絕漠
又扶雲水問空寥東山不獨將碁至白社何須蓄酒招
谷口久無雙屐響好燒松火話終宵

偕天中清臣赤岳遊千山因老馬不前獨回

相期連轡陟崔嵬，嚴雨初晴蕨正肥。
匹馬似將人共瘦，片雲不與鶴爭飛。
遙看濃霧知題壁，獨傍殘陽欲掩扉。
有石有松收拾遍，并携空翠滿囊歸。

落花

昏花片片逗中情，流水溪頭杖獨行。
短笛叫殘蝴蝶夢，疎鐘飄墮杜鵑聲。
塚邊有草猶春色，樹底無人空月明。
最苦一枝橫出處，年年風雪自孤撐。

雪公寄書入山偶成一律

何處堪逃乞食名，半龕殘雪裹餘生。
莫愁壑淺雲難臥，無那溪流水有聲。
飛矢漫追孤鶴影，遺絃不作老龍鳴。

只今最恨千層石難隔庾關萬里情

休道尋山山未深冰崖木佛共蕭森寒鍾不到疎林外
幽月空勞碧澗海獄沉頑鐵還餘氣爨後枯桐欲絕音
珍重故人相惜意尺書真不數雙金

喜阿字至

毳毳雙袖碧天遐路滑霜寒日未斜荒塚覓窮聞鶴語
殘檀嚼盡摘松花匡山雲月應無別遼海風濤漫獨嗟
知子遠來非有意久拚吾骨擲龍沙

和棲賢和尚見寄韻

鈿斧東來話近因寸緘未達共沾巾艱難菽水愁孤鉢

潦倒風沙泣罪人，入夜笳聲傳鴈塞。
何年斗氣合龍津，鄉關逾遠師顏老。
櫓斷遙知夢又頻。

丙申生日二首

何如四十六年前，莫遣雙眸見大千。
隨地不辭縈世難，到邊猶自愧風烟。
衰顏畏入南天夢，冷骨無煩古佛憐。
抖擻尚餘空布袋，逢人但乞一文錢。

每當此日雪風侵，羅嶽匡廬泪又深。
瀑水傾殘初夜夢，梅花撩亂十年心。
門庭淡薄空多愧，天地高寒只獨吟。
安得石梁添屐齒，共拈一瓣禮孤岑。

真乘先入匡山謁，樓賢後出塞訪余。
相見次始知

其父圖實信

相思每恨到來遲，把手相看喜復疑。
萬里鰥鶩常作伴，一瓢風雨自支饑。
傷心何限終難忍，開口仍留已盡知。
最好匡廬雙劍合，不禁回望白雲悲。

匡廬有雙劍峯

遙哭鄒白衣

精繪事

到死應知骨未摧，戴將白雪照泉臺。
江山紙上還留影，富貴生前幸不才。
短札幾回通遠磧，長歌徒自委荒萊。
塵埋雙管卮亭冷，從此梅花不必開。

雙管瓶卮亭公所隱處也

和掌邦第二首

有小序

阿字出塞簡布袋破紙有二詩云是子族弟掌

邦所寄也掌邦名宗禮從楚江入匡謁栖賢留
十餘日便辭欲相訪業八閩月竟不知飄泊何
所嗚呼投荒以來骨肉凋殘殆盡乃不意復有
掌邦其人又復能作是語因和其韻亦異地墳
簾也

袞袞一搭是吾憂萬井風烟況未收早是無家心已斷
忽聞有弟泪重流洞庭波泛孤鴻影華表霜寒老鶴愁
兩地月明遙共望何時還照合江樓

空囊墨化蒼龍吼野寺鐘殘黑霧屯數代弓裘歸馬革
十年心膽碎鴛原急將短鋏彈庾嶺莫遣長歌度薊門

荒壟遺編重拭目離支樹下好招魂

附掌邦原詩

碧山風雨長離憂湖海烟塵恨未收有客扣鐔歌
六月何人擊楫渡中流數聲鼓角斜陽暮兩地飛
鳴鴻雁愁庾信江南哀不斷更堪王粲賦登樓

經旬雷雨蛟龍起入夢雲生虎豹屯四海羽書飛
白日十年戎馬躍中原但聞蘇武辭金闕不見斑
生入玉門紫塞黃榆千萬里瀋陽花月欲消魂

遙哭潤季兄同一見六在諸姪

潤季父於予爲諸伯官融邑令

黑霧黃旗白晝昏哭携猶子問乾坤到死不知仁義盡

入江翻見髮膚存，竟使匡門多氣色。
始看融縣有兒孫，鴿原濕遍年年淚。
那得餘聲更好吞。

得柱江書并詩因懷與治伯玉季納諸昆季

曾看舞象大江秋，一禮袞裳意莫儔。
短缺那知湖海濶，空囊欲攬地天愁。
燕歌一夜悲沙漠，鶴夢千年返石頭。
桃葉無情潮寂寞，何時花底共登樓。

聞柱江將至

笑指天山氣獨豪，先持尺素報吾曹。
長城雪壓龍文動，野戍雲開馬首高。
歌發欲呼猶子夢，泪飛先濕老僧袍。
荒魂招盡情無盡，收拾巖烟并海濤。

遙哭丁善甫梁漸子

幾回三笑度溪風
話盡仙羊恨轉蓬
桂樹折殘天地老
花磚踏碎水雲空
幸將短髮皈黃面
定有遺文化白虹
獅子獨憐頭尚在
鴈聲愁斷大關東

遙哭梁同庵

栖賢哭詩有半榻
寒燈風雨舊之句

舊鄉朋好委荒榛
兩見書來爾是人
已買草鞋叅磧雪
旋將藥裹別江春
寒燈半榻愁尊宿
絲袖空堂泣老親
從此花田無鶴夢
遊魂應度雁門津

卽事

雪底紛紛望舊關
鳳書先取一人還
來時霧雨遮黃閣

去日風雲起白山不築沙堤皇道蕩重圍玉帶舞衣斑
奸圖一幅流民苦楓陛從容動聖顏

喜戴三謁文廟

黃沙黑水亦衣冠廟貌荒涼禮樂殘夫子隨時無不可
流民好學是爲難已看絲筆能生氣莫道青衫足耐寒
地下江西生死望看花騎馬踏長安

送魏李二公靈櫬回二首

金雞昨夜到陰山帶雪鋤冰淚莫潛無限生人妒死骨
極憐死後似生還童男幼女辭寒積素幔靈輻向舊關
料得黃墟開口笑一齊泥首拜龍顏

白水吞聲各一杯遊魂初下望鄉臺
共歸齊魯丘園舊但過城頭鼓角哀
泉底翻能見天日沙邊何必盡風雷
陽春枯骨多生肉從此關門日日開

寄無壞師

擲却儒冠換衲衣松門流水自棲遲
曾尋鄭子論心史獨向寒山問舊詩
塞草萋萋應未剗秋風颯颯易相思
東來白馬君知否莫守孤巖日已欹

賀貴庵水災

深秋風雨苦連宵瓶鉢郎當一瞬漂
龐老有船曾用載丹霞無佛不須燒
身家浮沫寧常聚性海狂瀾尚未消

從此還山松月好一枝猶自足鷓鴣

得浴予叔書

年過八十兵戈後一紙蠅頭手自書雲外阿玄猶未死
眼前小隱已無餘青衫裹骨歸荒塚黃口依人失故廬
郭外遺田祠內主幾回洒血染殘裾

得九成弟書

雙魚夜到鴨江濱先代弓裘不可論骨肉盡凋餘兩弟
詩書能復讓他人須知佛法無多子那見儒冠定誤身
但自莫慚世出世臨風三噓淚猶頻

遙哭安仲叔

一生半醉爛天真到死依然未覺貧
杯杓便當傳後業
袈裟終不憶前身
竟呼兒女都隨我
肯把鬚眉更向人
最苦一絲猶未斷
年年挾卷哭江濱